

. Գր. Հակոբյան

## ԱՌԱՋԻՆ ՀԱՅ ԿԻՆ ԲԱՆԱՍՏԵՂԾ-ԵՐԱԺՇՏՈՒՀԻՆ

Մեր հին գրականության պատմության մեջ 8-րդ դարը շատ ազդեցիկ է: Եթե նախընթաց՝ յոթերորդ դարում հիշատակվում են քսանից-քսանչորս անուններ, որոնք դրադվել են մատենագրությանը, բանաստեղծությանը, հրապարակախոսությանը ու գիտությանը, ապա 8-րդ դարում մենք հանդիպում ենք միայն աչքի ընկնող երեք անունների՝ Օհան Օձնեցի, Ստեփանոս Սյունեցի և այդ դարի ավերածությունները նկարագրող պատմիչ՝ Ղևոնդ վարդապետը:

8-րդ դարի ազդեցության ֆոնի վրա փայլում է մի գեղեցիկ աստղ՝ դա՛ Րվին մայրաքաղաքի կաթողիկոսարանի ավագ երեցի աղջիկը՝ Սահակդուխտն է: Վերևում հիշված Ստեփանոս Սյունեցին Սահակդուխտի ավագ եղբայրն է, որը մեր գրականության պատմության մեջ հայտնի է ու նշանավոր որպես հրապարակախոս, շարականների հեղինակ և այդ շարականների եղանակներ հորինող՝ ականավոր երաժշտագետ: Ծիշտ է, ավանդությունը Սահակդուխտի կողքին 8-րդ դարում գնում է նաև մի ուրիշ կին՝ բանաստեղծուհու՝ Խոսրովիդուխտին, որը Վահան Գողթնացու քույրն էր և դարձյալ ըստ ավանդության՝ Գողթնացուն նվիրված «Ջարմանալի է ինձ» հայտնի շարականի հեղինակը: Սակայն ավանդությունը դեռ բոլորը չէ, որովհետև մեր գրականության պատմության մեջ գրավոր ոչ մի հիշատակություն չկա Խոսրովիդուխտի բանաստեղծ և «Ջարմանալի է ինձ» շարականի հեղինակը լինելու մասին: Մեր կարծիքով, Գողթնացու նահատակությանը ձոնված վերոհիշյալ շարականի հեղինակը ոչ թե Խոսրովիդուխտն է, այլ Սահակդուխտը:

Չնայած 7-րդ դարում նորից սկսվել էր արվեստի, գրականության, գիտության ու կուլտուրայի առաճը, սակայն արարական բարբարոս հորդանների ավերածությունները արդելակեցին այդ առաճընթացը և խանգարեցին հայ հասարակական կյանքի ու մտքի բնականոն, նորմալ զարգացումը:

Այժմ ծանոթանանք 8-րդ դարի նշանավոր բանաստեղծ-երաժիշտ Ստեփանոս Սյունեցու և նրա ընտանիքի հետ, ուր հասակ առավ, կրթվեց ու դաստիարակվեց, ուժեղ կերպով Ստեփանոսի ազդեցությունը վրա կրեց նրա շնորհալի քույրը՝ Սահակդուխտը:

«Էր սա որդի աւագ երիցու մեծ մայրաքաղաքին հայոց Րվնա, — Ստեփանոսի մասին գրում է Օրբելյանը, — և սնանէր զարդանայր ուսմամբ ի տան կաթողիկոսարանին Հայոց»<sup>1</sup>:

Երևում է, որ քույր ու եղբայր եղել են կրթված, գրագետ ու գրասեր ընտանիքից, որն ապրել է մայրաքաղաքում, այն էլ կաթողիկոսարանի հետ սերտ կապված: Բնական է, որ նրանք պետք է ստանային կանոնավոր և բաղմակողմանի կրթություն՝ ալդպիսի մի միջավայրում: Հայրապետանոցում ստացած կրթությամբ շի բավականանում Ստեփանոսը: Նա սկզբ-

<sup>1</sup> Ս. Օրբելյան, Պատմութիւն նահանգին Սիսական, Թիֆլիս, 1910, էջ 132:

բում գնում է ժամանակին շատ անվանի Մաքենայոց վանքի դպրոցը՝ Սեանա լճի հարավ-արևելյան կողմում, որտեղ իր գիտելիքներով ու սրբափայլ վարքով հռչակված էր Տհարանց հայր՝ Սողոմոն գիտնական վարդապետը։ Ստեփանոսի միշտ որոնող միտքը այս վանքում ստացած կրթությունից բացի չի բավականանում և գնում է Սյունյաց վարդապետարանը, որն այն ժամանակ համարվում էր Հայաստանի նշանավոր, բարձրագույն հոգևոր դպրոցը և որակվում էր որպես Շրջոյր իմաստությունների աղբյուր<sup>1</sup>։ Այս դպրոցն ավարտելուց հետո Ստեփանոս Սյունեցին ստանում է ամբիոն և ինքն է ուսուցանում վարդապետանոցում որպես դասախոս։

Տեստաւ յամբիոնն բարունական և մէկնէր զաստուածային գիրս աշակերտելոցն ի վարժարանին<sup>2</sup>։

Ստեփանոս Սյունեցու միշտ որոնող միտքը այս անվանի դպրոցում ստացած գիտելիքներով էլ չի գոհանում և մեկնում է արտասահման՝ Կ. Պոլս, Հոռոմ՝ հունական և հռոմեական գրականությունն ու իմաստասիրությունն ուսումնասիրելու համար։ Երկար տարիներ Հունաստանում և Հոռոմում սովորելուց ու կատարելագործվելուց հետո, գիտնական բանաստեղծը վերադառնում է հայրենիք և նվիրվում մատենագրության ու երաժշտության։ Նա եղել է 8-րդ դարի ամենադարգացած մարդը, ամենանշանավոր հրապարակախոսն ու երաժշտագետը։ Նա ունեցել է բեղմնավոր գրիչ ու բազմակողմանի տաղանդ։ Գրել է ճառեր, մեկնություններ՝ դավանաբանական բնույթի, դանաղաբ թարգմանություններ. ունի նույնիսկ քերականական մի մեկնություն, որի համար էլ հավանաբար ստացել է «քերթող» անունը։ Բայց ամենից շատ մեզ հետաքրքրում է Սյունեցին որպես երաժիշտ և որպես բանաստեղծ, որն անշուշտ իր բարերար ու բազմակողմանի ազդեցությունն է թողել քրոջ՝ Սահակդուխտի վրա։

Ստեփանոս Սյունեցու բանաստեղծական և երաժշտական տաղանդի մասին Կիրակոս Գանձակեցին ասում է.

«Մեծն Ստեփանոս Սյունեցի աշակերտ Մովսէսի... արար և երգս հոգևորս քաղցր եղանակաւ, շարականս և կցուրդս և այլ երգս<sup>3</sup>»։

Իսկ Ստ. Օրբելյանը Սյունեցու հատկապես երաժշտական գործունեությունից մասին ավելի որոշակի և ավելի մանրամասն է խոսում.

«Արար և ճառս բաղումս բաժանեաց զուրն ձայնսն և կարգեաց, շարեաց զՅարութեան օրհնութիւնսն, երգեաց կցուրդս քաղցրահամս յարմարեաց և զստողոգին Յինանց եօթն եղանակօք յոյժ խորհրդաւոր, և զպահոցն, որ յաղուհացսն երգի. մեկնեաց և զԽորհուրդ գիշերային պաշտամանն<sup>4</sup>»։

Դժբախտաբար, որքան շատ են տեղեկությունները Ստեփանոս Սյունեցու կյանքի ու արվեստի ասպարեզում նրա գործունեության մասին, այնքան աղքատ ու քիչ են տվյալները նրա քրոջ՝ մեր առաջին կին բանաստեղծի, երաժիշտ և երաժշտության առաջին ուսուցչուհու մասին։

Հասկանալի է, որ Սահակդուխտը ուսումն առել, երգել ու կարգացել է այդպիսի մի կուլտուրական ընտանիքում, հատկապես իր հոր՝ Սահակ

<sup>1</sup> Ստ. Օրբելյան, էջ 133։

<sup>2</sup> Կիր. Գանձակեցի, «Պատմութիւն հայոց», Թիֆլիս, 1909, էջ 68։

<sup>3</sup> Ստ. Օրբելյան, էջ 138—139։

երեցի և եղբոր՝ Ստեփանոսի մոտ մայրաքաղաքի ամենակուլտուրական հաս-  
տատություն՝ կաթողիկոսարանի միջավայրում:

Սահակգուխտի եղբայրը հաճախել ու սովորել է կաթողիկոսարանի  
գլխավորում: Այստեղ էլ նա ստացել է նախնական կրթությունը: Երևում է,  
որ Ստեփանոսը ոչ միայն ուժեղ չափով ազդել է քրոջ բանաստեղծական  
ու երաժշտական ընդունակությունների վրա, այլև զարկ է տվել Սահակ-  
գուխտի ընդունակությունների զարգացմանը:

Մեր մատենագրության ու նրա պատմության մեջ մի փոքրիկ պա-  
տահիկ տեղեկություն կա Սահակգուխտի մասին միայն մի պատմագրի՝  
Ստեփանոս Օրբելյանի մոտ, այն էլ ընդամենը տաս տող, երբ նա խոսում  
է Ստեփանոս Սյունեցու մասին, ի միջի այլոց ասում է նաև այդ մի քանի  
րոտերը եղբոր կապակցությամբ:

«Էր և սորա քոյր մի՝ ի մանկութենէ ստացեալ զվարս կուսութեան  
և առանձնացեալ ի ձորակին Գառնուոյ յայրի միոջ, և անտանելի վարս  
ճգնութեան կրէր յանձին որոյ անուն Սահակգուխտ<sup>1</sup>»:

Հայտնի չէ, թե ինչն է եղել պատճառը, որ ավագ երեց Սահակի գուստրը,  
այդ մատաղ, փափուկ և սպիտակ հասակով կույսը, մենասեր յաւերժա-  
հարսին նման թողուց հեռացաւ յաշխարհէ և միայն իր ընտանեաց սեփա-  
կան տուրքը՝ հոգեխոս քնարն առաւ հետը և մէկ հատիկ արժանաւոր միայ-  
նութեան տեղ ընտրեց հոն»<sup>2</sup>, գեղեցիկ, վեհ ու անգնդախոր պատմական  
Գառնիի ձորերի քարայրերում:

700—730 թթ. չեն հիշատակվում 'հեղամա լեռներում կամ Սյունյաց  
անտառներում կուսանոցներ կամ անհատ մենակյաց ճգնավոր կույսեր, որ-  
պիսին Սահակգուխտն է եղել: Շատ հնարավոր է, որ պատանեկական հոգե-  
կան մի ծանր վիշտ և կամ գուցե անհաջող, անարձագանք մի սեր ստի-  
պել է գեղատեսիլ այդ ժամանակահատվածում կույսին մատաղ հասակում թողնել ըն-  
տանիքը, հրաժարվել դեռ նոր իր համար ծաղկող կյանքից և առանձնանալ  
Գառնիի ձորի մութ քարայրներում: Հավանական է, որ Սահակգուխտի  
տնից հեռանալը տեղի է ունեցել եղբոր գնալուց հետո, երբ նա ուսում էր  
որոնում Հայաստանի վանական գլխավորներում և կամ դարձյալ ուսման  
նպատակով արևմուտք (Կ. Պոլիս, Հռոմ) գնացած տարիներին:

Պատմագրի հաղորդածից երևում է, որ Սահակգուխտը ապրե-  
լով քարանձավում ու մենություն մեջ, բոլորովին էլ կտրված չի եղել  
աշխարհից ու իրական կյանքից: Իր եղբոր արժանավոր շնորհալի քույրը,  
թեկուզ և քարայրում, զրադվում էր երաժշտությամբ և մանկավարժու-  
թյամբ: Եթե Ստեփանոսը «կարգում ու շարում» էր շարականները, կար-  
գավորում ու դասավորում էր մեր հին կլասիկ երաժշտության՝ եկեղեցու  
ութ ձայներն ու եղանակները, հարստացնում էր մեր հոգևոր երգն ու երա-  
ժշտությունը՝ իր «քաղցրահամ» կցուրդներով<sup>3</sup>, ապա Սահակգուխտը թե-

<sup>1</sup> Ստ. Օրբելյան, էջ 139:

<sup>2</sup> Հ. Ա. Ալիշան, «Յուզիկ հայրենեաց», Ա. հատոր, էջ 290:

<sup>3</sup> Կցուրդ կոչվում է մեր եկեղեցական հոգևոր երգը: Եինչ որ Հ. Օձնեցու «Ատենա-  
բանութեան» և Թեոդորոսի «Դովեստի» մեջ կցուրդ է կոչվում, նույնը շարականի մեջ...  
ասվում է հոգևոր երգ, որ մեր մատենագրության մեջ հաճախ հիշվում է սաղմոսների և  
օրհնությունների հետ... իսկ կցուրդ կոչվել են առանձնապես նոր հոգևոր երգերը նույ-  
նիսկ 5-րդ դարում:

Նոր երգերը այդպես կցուրդ կամ կցուրդ կոչվել են այն պարզ պատճառով, որ

կուզ և մութ մենության մեջ, զրադվում էր բանաստեղծություններ և երգեր հորինելով: Եթե եղբայրը Մաքենյաց և Սյունյաց վարդապետարաններում ամբիոնից սովորեցնում էր հայոց բանն ու քաղցր եղանակները, ապա քույրը նույնպես զրադվում էր ուսուցանելով քաղցր մեղեդիներ ու երգեր: Գալիս էին Գառնիի ձորը խումբ-խումբ տղաներ ու աղջիկներ Սահակգուխտի մոտ՝ երգ ու երաժշտություն սովորելու: Հեղահամբույր ու սեռասքեմ կույսը նստում էր վարագույրի ետև և այնտեղից սովորեցնում իր աշակերտներին:

«Սա յոյժ հմուտ էր երաժշտական արհեստին, որ ի ներքո վարագույրի նստեալ ուսուցանէր զբազումս»<sup>1</sup> — ասում է Ստ. Օրբելյանը: Սահակգուխտը նաև մեր առաջին կին երաժիշտն է, երաժշտության առաջին դասատուն և առաջին կին մանկավարժը:

Սահակգուխտը հորինել է հոգևոր երգեր՝ կցուրդներ, մեղեդիներ, շարականներ, որոնցից մեկը նվիրված է եղել Մարիամ աստվածածնին և այդ բանաստեղծության տների սկզբնատառերը կազմել են իր անունը՝ Սահակգուխտ: «Եւ արար կցուրդս և մեղեդիս քաղցրեղանակս, յորոց մին՝ սրբուհին Մարիամ, որ իւր անուամբն է յօրինեալ»<sup>2</sup>: Սակայն շատ ավստոս, որ Սահակգուխտի այդ ակրոստիկոս բանաստեղծությունից մեզ հասել է միայն առաջին տունը, որն է՝

«Սրբուհի Մարիամ սափոր ոսկի  
Եւ տապանակ կտակարանաց,  
Որ զի վերուստ զհացն կենաց  
Պարգևեցեր քաղցեալ բնութեանս.  
Առ նա միշտ բարեխօսեա՝  
Վասն քաւութեան մեղաց մերոց»<sup>3</sup>,

Մեզ հասած բանաստեղծության այս բեկորից էլ երևում է, որ Սահակգուխտը լավ ծանոթ է եղել մեր շարականների «մեծացուցէ» կոչված տեսակին, ուր փառարանվում է Մարիամ Աստվածածինը: Ճիշտ է, Սահակգուխտը ընդհանրապես լավ է իմացել մեր շարականները, որոնք ութերորդ դարում դեռ այնքան էլ շատ ու բազմատեսակ չէին (ինչպես այն եղել է հետագա դարերում, մինչև 13-րդ դարը, երբ փակվեց շարականների մուտքը ժամակարգության մեջ), բայց և այնպես վերևում հիշված նրա բանաստեղծությունից պարզվում է, որ ձևի ու բովանդակության շատ նմանություններ կան Սահակգուխտի գրածի և մյուս «մեծացուցեների» միջև: Մեր ասածը հիմնավորելու համար բերենք մի քանի օրինակներ այդ տեսակի շարականներից:

«Կանոն ծննդեան սուրբ Աստուածածնին» շարքից վերցնենք «Առաւօտ խաղաղութեան և արուսեակ զուարթարար» «մեծացուցէի» վերջին տունը:

Պրանք սկզբում եղել են փոքրիկ երգեր և իրեն հավելված ասվել, կցվել են Ս. զրբի սաղմոսներից կամ օրհնություններից հետո: Մ. Աբեղյան, «Հայոց հին զրականության պատմություն», գիրք առաջին, էջ 480, 1944, նրկան:

<sup>1</sup> Ստ. Օրբելյան, նույն տեղում, էջ 139:

<sup>2</sup> Նույն տեղում:

<sup>3</sup> Հ. Ղ. Ղևոնդ, Մ. Ալիշան, «Յուշիկք հայրենեաց հայոց», հատ. Ա, էջ 291, 1899, «Աղար»:

«Տապանկ ապրեցուցիչ<sup>1</sup>  
Եւ տաղաւար Արրահամեան,  
Անդադար երգով սոքօք  
Զքեզ միշտ մեծացուցանեմք»<sup>2</sup>

Բերենք մի ուրիշ համեմատություն «Աւետեաց կանօն»-ից.

«Ուրախ լեր սափոր ոսկի երկնային,  
Հացին որ զառ ի վերուստ իջեալ,  
Զմանանայն կենաց նորոյս  
Պարգեւեալ կերակուր Խորաեղի...»<sup>3</sup>

ևսմ

«Կենդանի տապանակ կտակարանաց նորոյ ուխտիս  
Որով ելք յերկիր աւետեաց հորդեալ...»<sup>4</sup> և այլն:

Եթե Սահակդուխտի բանաստեղծության մեջ Մարիամ տիրամայրը երկնից կենաց հաց է տալիս քաղցած մարդկությանը, ապա «Աստուածա-  
նայտնութեան» կանոնի «երկրորդ աւուր» օրհնություն կոչված շարականի  
մեջ ծարաված մարդկությանը Մարիամը կենաց աղբյուրից ջուր է տալիս,  
որ ծարավների հոգին հազենա և մեղավորները մաքրեն իրենց մեղքերն  
այդ երկնային ջրով ու իրենց արտասուքներով:

«Աղբյուր կենաց բղխեալ յեղեմայ սուրբ աստուածածին  
Որով արբեցաւ երկիր ծարաւուտ հոգւոյն իմաստիւք.  
Տալ մեզ մաղթեա աղբիւրս արտասուաց,  
Մաքրել զմեզ ի մեղաց մերոց»<sup>5</sup>:

Ըսկ այս շարականի վերջին տան մեջ արդեն տրված անմահական  
հացի և ուրախարար բաժակի համար հեղինակը կոչ է անում՝ փառաբանել  
աստվածածնան հոգևոր երգով:

«Զանապական կոյսն Մարիամ աստուածածին,  
Խոստովանի սուրբ եկեղեցի,  
Ուստի տուաւ հացն անմահութեան  
Եւ բաժակ ուրախարար  
Տուք օրհնութիւն նմա հոգևոր երգով»:

Վերջապես նույն կանոնից դարձյալ աստվածածնան նվիրված մի ու-  
րիշ շարականի երկրորդ տունն էլ համեմատենք և սահմանափակենք:

«Փափկութեան դրախտին, բացող բանալի,  
Քրիստոսի բարձող, նմանող երկնից,  
Սափոր ոսկեղեն լի մանանայիւ,  
Գաւազան ծաղկեալ յարմատոյն յեսեայ՝  
Տաճար լուսոյ մորն...»<sup>6</sup>:

<sup>1</sup> Մեջ բերվող բոլոր շարականները տողատել է հոգվածագիրը:

<sup>2</sup> Շարական Ս. Էջմիածին, 1830, էջ 14:

<sup>3</sup> Շարական, էջ 19:

<sup>4</sup> Անդ, 19:

<sup>5</sup> Շարական, էջ 31:

<sup>6</sup> Մեր շարականների մեծ մասը սովորաբար կազմված է լինում 3 տնից:

<sup>7</sup> Շարական, էջ 32:

Այս շարականների համեմատությունները, տեղ-տեղ նույնիսկ բառացի նմանություններն ու կրկնությունները, մեր կարծիքով ցույց են տալիս երկու բան.

Առաջին՝ քիչ վերևում մեր այն կարծիքը, որ Սահակդուխտը հմուտ է եղել ոչ միայն երաժշտական արվեստի մեջ, այլև շատ լավ իմացել է շարականները, հատկապես նրանց մեծացուցեցների տեսակը, հաստատվում է բերված օրինակներով: Վերջիններս բոլորն էլ ներբողներ են՝ նվիրված աստվածածնուն Վեծացուսցէ՞ս շարականներից, որոնք վերագրվում են Մովսես քերթողին՝ 5-րդ դարում:

Երևացող նմանությունները, ոճը հիմք են տալիս ենթադրելու, որ այդ շարականների մի մասը, հնարավոր է, որ գրած լինի Սահակդուխտը, որոնք որպես կցորդ և մեղեդիներ հետագայում մտել են ժամակարգություն կանոնների մեջ, ինչպես մտել են շատ շարականներ՝ Ստեփանոս Սյունեցու գրածներից:

Պետք է ասել, որ մեր շարականներից շատերի հեղինակները դեռ լրիվ պարզված չեն, հետևարար դժվար է միայն վերլուծություն անել նմանությունների որոշել նաև այդ շարականների ժամանակը: Մովսես քերթողին մեր Շարակնոցի (1830 թ.) առաջարանը վերագրում է Վեդրազալուցի ուրախացիին, դկարգ ծննդեանն և զԱնթառամ, զՏեառն ընդ առաջին, զՅարութեան հարցսն, և զառաջին պատկերսն հոգևոյ գալստեան, զՎարդավառի և զՎերափոխման և զՄեծացուսցէքն՝:

Բայց որ Վեծացուսցէքն, որովհետև այդ տեսակ շարականների թիվը մեր շարակնոցներում հարյուրների է հասնում, որոնք մտնում են տարբեր կանոնների մեջ և ունեն տարբեր ձայներ և բոլորովին տարբեր ձև ու արտահայտչական միջոցներ: Հետևարար ճիշտ չի կարող լինել, որ բոլոր մեծացուսցեները մի մարդու գրածը լինեն, ով էլ լինի նա: Որ այդ մեծացուսցեների մեջ կան նաև Սահակդուխտի ձեռքով գրածներ, դա շատ հնարավոր է, բայց որը դրանից, ինչպես պարզել այս հարցը, ժամանակն է, որ մեր բանասիրությունը այս խնդրով զբաղվի:

Գա մի գեղեցիկ լիբիկական շարական էլ մեր ժամակարգության մեջ, որը ոչ թե բխում է Ս. Գրքի այս կամ այն ասույթից, այլ ունի ազգային գույն ու պատմական նշանակություն: Դա Վահան Գողթնացուն նվիրված Ձարմանալի է ինձ՝ բառերով սկսվող ԲԶ (երկրորդ) ձայն ունեցող, 5 տնից բաղկացած հայտնի շարականն է: Ավանդությունը այս սրտառուչ ներբողը վերագրում է Վահանի քրոջ՝ Սոսրովդուխտին, ինչպես նշվեց հոգվածի սկզբում: Սակայն մեր մատենագրության ու հիշատակարանների մեջ ոչ մի տեղ գրավոր որևէ հիմք չի մնացել այդ մասին, որ Սոսրովդուխտը եղել է բանաստեղծուհի, զրել է շարական կամ ուրիշ մի որևէ ժանրի գործ: Այժմ քննենք այն հարցը, թե ով է գրել այդ շարականը:

Դեռ 19-րդ դարի երկրորդ կեսերում մեր բանասիրության մեջ եղել են կարծողներ, որ այդ շարականը հավանաբար գրել է Սահակդուխտը: Հ. Ալիշանը դեռևս 1869 թ. Վահան Գողթնացու և նրան նվիրված շարականի մասին խոսելիս, ենթադրում է, որ էթե ավանդությունը լուր Սոսրովդուխտի-

<sup>1</sup> Շարականի առաջարանը, 1830, էջ 1-րդին, էջ 3:

տի մասին, ապա այդ շարականը անկասկած պետք է վերագրվեր կամ Վահանի կնոջը, կամ Սահակղուխտին:

«Սա ինքն է աւանդութեամբ վկայեալ և սրբադանեալ երգունի մեր, զոր թեև նա (աւանդութիւնն) լռէր, հարկ էր մեզի կարծել՝ կամ Վահանայ անտարակոյս սիրողը, այսինքն իրեն հարսնացեալ Սիւնեաց օրիորդը և կամ անոնց երկուքին ժամանակակից և վկայուած մեծանուն հայ երգունի մ'ալ, որ քեզ ալ Հայկակ, անծանօթ չէ Սահակղուխտն այն՝ քոյրն Ստեփանոսի Սյունեցւոյ»<sup>1</sup>:

Այսպիսի կարծիք հայտնվել է նաև մի ուրիշ, նույնպես մեծանուն բանագետի կողմից: Խոսելով Սահակղուխտի մասին որպես բանաստեղծուհի, Մ. Օրմանյանը ասում է.

«Իրեն գրվածքներն կհիշվի Սրբուհի Մարիամ երգը գուցե և Վահան Գողթնացիի «Ջարմանալի ե ինձ» շարականը, որը փափուկ զգացումներ կրուրե, որ ուրիշներե Վահանի քրոջ կվերագրվի (589), որ ծանոթ անձ մը չէ, մինչ Սահակղուխտի ու Վահանի մեջ առաջուց հոգեվոր հաղորդակցություն եղած ըլլալը շատ հավանական է»<sup>2</sup>:

Վահան Գողթնացին, Խոսրովիղուխտը և Սահակղուխտը ժամանակակիցներ են եղել, գուցե և աննշան տարբերությամբ՝ հասակակիցներ: Այն տարիներին, երբ Վահանը հոգեկան խորն ու ծանր ողբերգություններ ապրելով՝ անօգնական թափառում էր Հայաստանի մենաստաններն ու վանքերը, հավանական է, որ այդ թափառ կյանքում Վահան Գողթնացին եկել է նաև Գառնի, ուր երկու բարեպաշտ և գեղեցիկ երիտասարդները ծանոթացել են, ստեղծվել է նրանց մեջ հոգեկան կապ՝ ինչպես իրավացիորեն այդ կապի մասին ենթադրում են երկու հմուտ ու մեծանուն հայ բանագետները՝ Հ. Ալիշանը և Մ. Օրմանյանը:

Այժմ անցնենք Վահան Գողթնացուն նվիրված նշանավոր շարականի քննությունը, թե ով է այն գրել, Խոսրովիղուխտը, թե Սահակղուխտը:

Եթե Խոսրովիղուխտի բանաստեղծ լինելու մասին միայն ավանդությունն է ասում, որը չի կարող հիմք համարվել, ապա Սահակղուխտի մասին մենք ունենք պատմական գրավոր հիմք և այն էլ մեր պատմաբանների մեջ օրյակտիվ պատմիչներից մեկը, որը, ինչպես տեսանք, հիացմունքով է խոսում Սահակղուխտի մասին, որ նա գրել է ոչ թե մի, այլ շատ բանաստեղծություններ՝ «շարականներ, մեղեդիներ», որոնցից մեկն էլ «Սրբուհի Մարիամն» է, որը հավանաբար մի պոեմ է եղել, կամ համենայն դեպս 9—10 տնից ոչ պակաս մի գործ, որովհետև պատմիչն ասում է, որ բանաստեղծությունների գլխատառերը կաղմել են Սահակղուխտի անունը, որը 9—10 տառ է կաղմում՝ մեր մատենագրության մեջ գործածված իր տարրեր ձևերով (Սահակղուխտ, Սահակիղուխ, Սահակաղուխտ):

Բացի այդ, մեր հին գրականության մեջ ակրոստիկոս կաղմոց բանաստեղծությունները շատ անգամ միայն հեղինակի անունը չէ, որ դրսևորում են գլխակապ գրերով, այլ նաև՝ թե ում գրածն է այդ գործը՝ «երգը», «բանը»: Օրինակ՝ Նարեկացու ակրոստիկոսներից շատերը կաղմում են «Գրիգորի է երգս», «Գրիգորի է բանս այս», Շնորհալու նույն ձևի գրած:

<sup>1</sup> Հ. Ալիշան, «Յուզիկը հայրենեաց հայոց», հատ. Բ. էջ 196, Վենետիկ, 1889:

<sup>2</sup> Մ. Ես. Օրմանյան, «Ազգապատում», Ա. էջ 867—868. Կ. Պոլիս, 1912:

ները կազմում են ճերմեխի է երգ», ճերմեխի է երգս այս՝ Այսպես է և խաչատուր վարդապետ Տարոնեցու «Խորհուրդ խորին» հանրահայտ բանաստեղծությունն ու երգը և այլն և այլն:

Ուրեմն՝ շատ հավանական է, որ Սահակդուխտի գրած «Սրբունի Մարիամ» բանաստեղծությունը եղել է 15—18 տուն կազմող մի գործ, գուցե և ավելի:

Այնուհետև եթե անգամ ընդունենք, որ մեզ հասած անգիր այդ ավանդությունը ճիշտ է, որ այդ շարականը գրել է Վահան Գողթնացու քույրը՝ Խոսրովիդուխտը, բայց շարականի ոճը, հեղինակի լիրիկական գիմունքները, ներբողված հերոսին, բոլորովին այլ բան են ասում: Եթե Վահանը Գողթնաց խոսրովիդուխտի տղան է, տեր է, այսինքն՝ ոչ հասարակ ուսման մարդ, ապա Խոսրովիդուխտն էլ նույն իշխանի աղջիկն է, տիրունի է, այսինքն՝ ոչ հասարակ գեղջկունի, այլ իշխանի դուստր, նշանակում է բանաստեղծության ամեն տան վերջում քույրը չէր ասի եղբորը՝ «ով երանելի տեր Վահան», կամ վերջին տան վերջում չէր ասի «ով երանելի տեր Վահան Գողթնացն իշխեցող»: Եթե մեկ ուրիշ մարդ այդ ձևով ու ոճով գիմեր նահատակված Վահանին, այն թերևս հասկանալի լիներ, սակայն այս ձևի ոճն ու գիմումը քրոջ ոճ ու գիմում չէ: Գուցե այդ ոճը մի կերպ հասկանալի լիներ նաև, եթե Գողթնացի Վահանը ունենար հոգևորականի կոչում, բայց Վահանը այդպիսի կոչում չի ունեցել, այլ եղել է սովորական աշխարհական մարդ, իսկ տեր բառը այն ժամանակներում գրվում էր միայն հոգևորականների ու իշխանների անունների վրա:

Վերջին «Գողթնացն իշխեցող» բառերը ցույց են տալիս, որ շարականի հեղինակը ոչ միայն Վահանի քույրը չէ, այլ Գողթնացի էլ չէ, որովհետև քույրը այդպես չէր գիմի եղբորը, քանի որ ինքն էլ Գողթնացի է եղել:

Շարականում արտահայտված նուրբ, սիրային ու լիրիկական զգացումները ցույց են տալիս, որ իրոք նախապես, մինչ այդ շարականը «հոգեկան հաղորդակցություն» է եղել Սահակդուխտի և Վահանի մեջ, որ ամբողջ բանաստեղծության մեջ արտահայտված մտքերն ու զգացումները ավելի շուտ պատկանում են Սահակդուխտին, քան թե Խոսրովիդուխտին: Ահա այդ շարականը.

«Զարմանալի է ինձ քան զերգս երաժշտականաց.

Չայնս ողբոց քոց հնչմունք,

Ով երանելի Տեր Վահան, ընտրեալ յԱստուծոյ»<sup>1</sup>:

Այս առաջին տունը ցույց է տալիս, որ շարականի հեղինակը միաժամանակ երաժշտության հետ սերտ կապված բանաստեղծ է, երաժիշտ է, որպիսին, ինչպես ասել ենք, եղել է Սահակդուխտը:

Երկրորդ տունը.

«Առաւել յորդորե այս զհոգւոյս մասունս

Յորինել քեզ երգս ոչ զղջականս.

Այլ հոգևորս և ուրախարար, յորդորականս և ներբողեանս

Ով երանելի Տեր Վահան, ծառայ Քրիստոսի»<sup>2</sup>:

<sup>1</sup> Շարական, էջ 480:

<sup>2</sup> Նույն տեղում, էջ 480:

Բանաստեղծուհին հիանում է Վահանի հերոսությունը, և «զարմանալի» է, որ նա փոխանակ ողբալու նրա վրա, տխուր ողբերի փոխարեն երգում է «ուրախարար» երգեր ու «ներբողներ»։ Հեղինակը ուրախանում է Վահանի տարած հոգեկան հաղթանակի համար, նրա գերմարդկային հաստատ վարմունքի համար։ Այս ամենը ոչ միայն զարմացրել են բանաստեղծուհուն, այլև ցնցել նրա ամբողջ հոգեկան աշխարհը — «զոգւոյս մասունս» — միտքը, կամքը վարարող զգացումները։ Եվ ահա Վահան Գողթնացու այդ հերոսական մահվանը վայել ուրախ ներբողյաններ է երգում հեղինակը օտար հողերի վրա արյուն թափած ազնիվ հայի ու ջերմ հայրենասերի համար։

Երրորդ տունը՝

«Ջարհուրեցուցանէ զքո ճգնութիւնդ

Ջմարմնոյս բնութիւնն,

Իսկ դու առաւել գտար,

Ով երանելի տէր Վահան սիրող Դրիստոսի»<sup>1</sup>։

Աստանդական թափառաշրջիկ կյանքը, կրած զրկանքները, հոգեկան անելանելի ծանր ապրումները, այս ամենը Վահանը տարել է տոկալով, անտրտունջ ու հերոսաբար։ Վահանի այսպիսի ուժեղ հոգի ու սիրտ ունենալը երգչուհուն զարմանքից հասցնում է զարհուրանքի։ Բայց այս բոլոր տանջանքները անտեղի չեն անցել։ Վահանը դրանց փոխարեն ճառաւէլ է գտել։ Նա այդ հերոսական մահով գտել է փառք, սլարծանք, հիշատակ և դարձել է «երանելի» անմահ։

Նախավերջի տան մեջ հեղինակը ուղղում է ասել, որ օտար բանաստեղծների (հավանաբար հունական և հռոմեական) ու իմաստասերների պաճուճարան գործերն ու հերոսները, սնոտի պատրանքներ ու դատարկ բաներ են Վահանի հերոսական, առաքինի գործի ու նահատակության համեմատությամբ։

«Արտաքնոցն ըզգաստքն

Ստեղծիչ բանք սնոտեայն ի պատրութիւն.

Իսկ քոյդ սիրայնոյ Աստուածարեալ և ոգեշահ,

Ով երանելի տէր Վահան, ընտրեալ ազատաց»<sup>2</sup>։

«Արտաքնոցն բանք սնոտեայն ի պատրութիւն» ասելով ամենայն հավանականությամբ հեղինակը նկատի ունի հունական անտիկ գրականությունը ու նրանց առասպելական հերոսները, ըստ երևույթին, «Իլիական»-ում և «Ոդիսական»-ում։

Շարականի այս տունը հատկանշական է նրանով, որ հեղինակը ոչ միայն լավ ծանոթ է եղել արևմուտքի գրականությանը, այլև կարողացել է վերլուծել, գնահատել ու բնորոշել այն, որպիսին երբեք չէր կարող անել խոսրովիդուխտը, որովհետև նա այդպիսի կրթություն ու զարգացում չի ունեցել։ Մենք նպատակով կանգ առանք Ծահակդուխտի միջավայրի և հատկապես նրա եղբոր՝ Ստեփանոս Սյունեցու կյանքի վրա։ Արդեն ասել ենք, որ ուժեղ է եղել Սյունեցու ազդեցությունն իր քրոջ վրա և ընդու-

<sup>1</sup> Շարական, էջ 460։

<sup>2</sup> Նույն տեղում։

նակ ու արվեստասեր երիտասարդ աղջիկը մեծ չափով օգտվել է իր եղբոր գիտելիքներից, այդ թվում՝ նաև «արտաքնոցն բանք»-ից (գրսի, արտասահմանյան գրականություն)։ Բանաստեղծությունն այս տունն առավել համոզեցուցիչ է այն բանի, որ այս շարականը, իրոք, պատկանում է «երգի ու արվեստի մեջ հմուտ» Սահակուխտին և ոչ թե Սոսրովիգուխտին։

Վերջին տան մեջ երգվում է Վահանը որպես հայրենիքի քաջ զինվոր, որը պատրաստվում է պատերազմի՝ թշնամուն հաղթելու համար։ Հայաստանից Բամասկոս ամիրապետի մոտ Վահանի գնալը, նրա համարձակ հայտարարություններն ու վճիռը այն մասին, որ ինքը պատրաստ է մեռնելու քան թե ուրանալու իր ազգն ու հայրենիքը, իսկապես սա մի անհավասար, անսուր, հոգեկան պատերազմ էր, ուր մի օտար, անօգնական բայց հոգով զինավառ ու կորովի երիտասարդը մենակ հոգեպես հաղթեց «հարաւայնոյ» (արարական) աշխարհացունց անեղ պետությունը, հավատարիմ մնալով իր նախնիքների ավանդներին ու հայրենիքին։

Ահա և վերջին այդ տունը.

«Որպես զքաջ նահապետ պատրաստեալ ի պատերազմ,  
Կատարեցէր զընթացքս քո արիարար յազգացն հարաւայնոյ,  
Դասաւորեալ ընդ անմարմնականսն.  
Ով երանելի տէր Վահան Գողթնեացն իշխեցող»<sup>1</sup>։

Բնակիչ այսպիսի բովանդակալից, բաղմիմաստ ու հորդ զգացումներով մի ներբող-շարական չէր կարող հանկարծակի գրել Գողթնում ապրող, որբացած, թալանված ու կրթություն չունեցող մի աղջիկ։ Սոսրովիգուխտը Վահանից շատ մեծ չէր կարող լինել, «Կրակի տարին» (706 թ.) Վահանը 4 տարեկան էր, երբ գերի տարան։ Սոսրովիգուխտը, եթե իրոք այդպիսի քույր ունեցել է Վահանը, այդ տարին շատ-շատ կարող էր 10 տարեկան լինել։ Հոր այրվելուց ու գուլքը թալանվելուց հետո Սոսրովիգուխտը հավանաբար ապրել ու մեծացել է իր հարազատների կամ բարեկամների մոտ։ Այդ տարիներին, այդ պայմաններում Սոսրովիգուխտը չէր կարող սովորել (այն էլ որտեղ կարող էր սովորել, նախ երկիրն ավերված էր և երկրորդ՝ այդ ժամանակ աղջիկները սովորելու գեղ չէին գնում, այլ սովորում էին ընտանիքում՝ ինչպես Սահակուխտն է սովորել հորից ու եղբորից), կանոնավոր կրթություն ստանալ, բանաստեղծություն գրելու համար։ Վերևում բերված օրինակներն ու շարականի վերլուծությունը հիմք են տալիս ասելու, որ Վահան Գողթնացուն նվիրված «Ջարմանայի է ինձ» շարականը գրել է ոչ թե Վահան Գողթնացու քույրը՝ Սոսրովիգուխտը, այլ Ստեփանոս Սյունեցու քույրը՝ Սահակուխտը, որը եղել է հեղինակ բաղմիմ երգերի, մեղեդիների ու շարականների։

Հնարավոր է, որ Գողթնացին և Սահակուխտը անձնական ծանոթներ էլ եղած լինեն։ Նրանք երկուսն էլ ժամանակակից երիտասարդներ են եղել։ Արարիայից վերադառնալուց հետո Վահանը Թափառաչքիկ կյանք էր վարում Հայաստանի վանքերում ու մենաստաններում։ Նա եղել է Դվինում, Էջմիածնում, Արագածոտն դավառի, Շիրակի, Գեղարքունյաց, Սյունյաց և այլ վանքերում։ «Եւ յայնմ հետէ ոչ լինէր նմա հանգիստ և զաղար ուրեք,

<sup>1</sup> Շարական, էջ 460.

այլ զկիսն թողեալ առ ընտանիս իւր ետ զինքն Աստուծոյ և կամաց նորա՝<sup>1</sup> Հնարավոր է, որ այս թափառումներն ժամանակ Վահանն ու Սահակդուխտը ծանոթացած լինեն, կամ Դվինում (նախքան Գառնի գնալը) կամ Գառնիում, երբ ճգնակյաց կյանք էր վարում անվանի կույսը:

736 թ. երբ տեղի ունեցավ Ստեփանոս Սյունեցու սպանությունը<sup>2</sup> Վայոց ձորում, այդ տարին Վահանը իր կնոջ ու հարազատների թախանձանքներին ընդառաջելով մի տարի մնաց այդ տեղ, նրանց մոտ և չթափառեց վանքերը:

«Եւ անդ ի Սունիս և ի Վայոց ձորն անցուցեալ տարի մի վասն թախանձանաց սիրելեացն»<sup>3</sup>:

Հնարավոր է, որ այդ տարում էլ Վահանը Վայոց ձորից Գառնի անցած լինի կույսի մոտ, որը այդ տարիներին Գառնիում էր: Չի կարող պատահել, որ այդ ժամանակ անուն հանած երկու բարեպաշտ երիտասարդները, եթե անձամբ չեն էլ տեսնվել, մեկը մյուսի մասին լսած չլինեին: Այստեղից էլ եղել է նրանց մեջ այն հոգեկան կապը, որի մասին հիշվեց: Վահան Գողթնացու պատումների մեջ ոչ մի հիշատակութուն չկա Սահակդուխտի մասին և դա զարմանալի չէ: Գողթնացին իր հոգեցունց ապրումների մասին պատմել է միայն Արծկեի Երաշխավորաց վանքի վարդապետ Արտավազդին (սա Արրահամ էլ է կոչվում) այն ժամանակ, երբ նա որպես անցորդ հյուր՝ երեք օր մնաց այդ վանքում: Կարելից և շնորհալի վարդապետը գրի է առել Վահանի ողբերգական կյանքի «Ողբը»<sup>4</sup> վկայաբանությունը: Եթե անդամ Վահանը ծանոթ էլ լիներ Սահակդուխտին, դժվար թե այդ մասին նա մի բան ասեր Արտավազդ վանականին, այն էլ Յ օրվա կարճատև ծանոթության ընթացքում: Իսկ եթե Վահանը ակնարկած կամ պատմած էլ լիներ այդ գեղեցիկ, բարեպաշտ ու շնորհալի կույսի մասին, դժվար թե Վահանի այդ կապի մասին վանական վարդապետը հիշատակեր իր «Ողբի» մեջ, ուր նկարագրված է Վահան Գողթնացու կյանքը և արարական բարբոսությունները:

Այսպես ուրեմն. Սահակդուխտը եղել է 8-րդ դարի առաջին հայ կին բանաստեղծը, երաժշտագետն ու երաժշտության առաջին ուսուցչուհին: Նա

<sup>1</sup> «Սոփերք Հայկական», ԺԳ, էջ 72:

<sup>2</sup> Այս խոշոր դրոշմն ու երաժշտագետը, որին մենք համառոտակի ծանոթացանք, ունեցավ շատ անսպասելի և ողբերգական վախճան 736 թ. հուլիսի 23-ին: Սյունեցին իր շրջադայելու և քարոզելու ժամանակ այդ թվականին եղավ Եղեգնյաց դավառի (Վայոց ձոր) Մողան դուղում: Այստեղ ապրում էր մի հարուստ, անբարոյական կին, որին իր սանձարձակ վարքի համար Սյունեցին մի քանի անգամ հանդիմանել էր՝ նրան ուղղելու համար: Այս անգամ էլ, երբ Սյունյաց եպիսկոպոս Ստեփանոսը ավելի խիստ և հրապարակով հանդիմանեց այդ պոռնիկ կնոջը, վերջինս որոշեց սպանել նրան: Մողան դուղից ոչ հեռու մի աղբյուրի մոտ, մի ուռենի սաղարթախիտ ծառի վրա իր տաղավարում ամառվա շողից հանդիստ էր առնում Սյունեցին: Այդ պոռնիկ կինը վերցրեց դանակը և իր հոմանուն հետ դնաց եպիսկոպոսին սպանելու: Դանակը տալով իր տարփածուի ձեռք, այս կինը երկու անգամ ստիպեց նրան բարձրանալ ծառը և սպանել քնած եպիսկոպոսին: Բայց հոմանին երկու անգամն էլ վախեցավ, ձեռքերը դողացին և չկարողացավ սպանությունը կատարել: Կինը խիստ հանդիմանելով իր զխկոտ հոմանուն, ինքը բարձրացավ ծառը և սուրը կոխեց Ստեփանոս Սյունեցու փորը և սպանեց քնած տեղը:

<sup>3</sup> Յայսմաւուրք, Կ. Պոլիս, 1830, էջ 474:

<sup>4</sup> «Ողբ վասն չարեացն աշխարհիս Հայոց և վկայաբանութիւն սրբոյն Վահանայ Գողթնացու» («Սոփերք Հայկական» ԺԳ. 1830, Վենետիկ:

րացի «Սուրբ Մարիամ» բանաստեղծությունից գրել է նաև շարականներ, գլխավորապես ներբողներ ու մեղեդիներ՝ ձեռնված Աստվածածնան «մեծացումից» կարգի շարականներում:

Ինչպես տեսանք, ամենայն հավանականությամբ Սահակդուխտն է հեղինակը նաև Դոդթնացուն նվիրված նշանավոր «Ջարմանալի է ինձ» շարականի: Որպես հմուտ երաժշտագետ նա հորինել է շատ եղանակներ ու սովորեցրել շատերին՝ իր ճգնարանում:

Այս տաղանդավոր կնոջ մասին, ինչպես ասացինք, րացի Օրբելյանից էլ ուրիշ ոչ մի տեղ, ոչ մի տեղեկություն չկա:

Երգահան բանաստեղծը հավանաբար մինչև իր կյանքի վերջն ապրել է պատմական Գառնիի գեղեցիկ ձորում: Նա իր ամբողջ կյանքի ընթացքում երգեր է հորինել, երգեր սովորեցրել և երգելով վախճանվել:

«Եւ անպէն ի նմին վախճանեալ դնի ի հանգստի յորմէ բաղում քժշկութիւնք լինին»<sup>1</sup>:

Այսպես է վերջացնում ժլատ պատմիչը մեր Ֆշանավոր առաջին կին բանաստեղծի մասին:

<sup>1</sup> Ստ. Օրբելյան, էջ 139: